



# ILIDŽA

## INFORMATIVNI BILTEN OPĆINE ILIDŽA

Ilidža • Juni 2018

• Broj 172





## Informacija o stanju bespravne gradnje na području općine Ilidža

Informacija o stanju bespravne gradnje na području općine Ilidža izazvala je burnu raspravu, nakon koje je donesen i zaključak da je potrebno održavanje tematske sjednice o temi urbanistički planovi i gradnja na području općine Ilidža. Inspeksijski nadzor u oblasti građenja se sprovodio nad radom svih učesnika u građenju, radom organa uprave, izvođenjem radova i kvalitetom građevinskih proizvoda koji se ugrađuju u pogledu primjene zakona. Općinska urbanističko građevinska inspekcija od osnivanja, septembra 1999 do 31. 12. 2017. imala je 9.266 predmeta, od čega 3.308 se odnosilo na upravne predmete u kojima je vođen upravni postupak i izricane mjere, a 5.958 predmeta se odnosilo na ne upravne postupke u kojima je izvršena kontrola bez izricanja mjera, upućen odgovor podnosiocu zahtjeva o stvarima iz prijave. Ukupno je sprovedeno 596 izvršenja od čega je 150 predmeta sprovedeno prinudno, putem drugog lica, dok su u 457 predmeta investitori sami sprovodili izvršenje i postupili po nalogu građevinskog inspektora. U toku 2017. urbanističko građevinska inspekcija je evidentirala manji obim radova bez građevinske dozvole nego predhodnih godina. Zatečeni bespravno izvođeni radovi pretežno su se odnosili na objekte kategorije pomoćni, prokopi ulica, ograde i slično. Urbanističko građevinski inspektori su u upravnom postupku imali u radu ukupno 447 novih predmeta, od čega je u 107 predmeta proveden upravni postupak radi izricanja mjera gdje je evidentirano građenje bez građevinske dozvole ili odstupanje od dobijene dozvole za građenje. Struktura bespravno građenih objekata u kojima je je vođen postupak u toku 2017. odnosila se na 19 stambenih objekata, 23 objekta iz kategorije poslovnih objekata i 65 objekata se odnosilo na kategoriju pomoćni objekti. Urbanističko građevinski inspektori i u prethodnom izvještajnom periodu redovno su kontrolisali i zone od posebnog javnog interesa, kao što su vodozaštitne zone, zona aerodroma i zone koje su definisane novom planskom dokumentacijom, gdje je obustavljena svaka nova bespravna gradnja. Vlasnici zemljišta iz vodoza-



štitne zone izrazili su nezadovoljstvo što su im vlasnička prava i dalje uskraćena i što se planirane aktivnosti uređenja vodozaštitne zone usporene ili se uopšte ne sprovode. Građevinski inspektori su neprekidno vršili nadzor i nad objektima koji su tretirani posebnim zakonom odnosno Zakonom o privremenom korištenju javnih površina i Općinskom Odlukom o privremenom korištenju javnih površina. Predhodnih godina produžavali su se rokovi za predaju zahtjeva za legalizaciju bespravno izgrađenih objekata, čime je uloga inspekcije bila svedena na vođenje upravnog postupka, zatim prekid tog istog postupka dok se postupak legalizacije ne okonča i po žalbi i upravnom sporu. Donošenjem odluka o legalizaciji bespravno sagrađenih objekata vremenom se gubila svrha i značaj podnošenja krivičnih prijava za bespravnu gradnju, pa su inspektori rijetko ili nikako podnosili krivične i prekršajne prijave. Kantonalna urbanističko građevinska inspekcija, kontroliše rad općinskih građevinskih inspekcija i već je dostavila više opomena općinskoj građevinskoj inspekciji zbog ne podnošenja krivičnih i prekršajnih prijava. Da bi se redovno podnosile krivične i prekršajne prijave, protiv investitora, izvođača i drugih sudionika u postupku, potrebno je potpuno poštivanje načela pravičnosti, nepristrasnosti i objektivnosti, te pružanje podrške općinskoj urbanističko građevinskoj inspekciji u samostalnosti pri odlučivanju.

## Donesena Odluka o načinu i uslovima prodaje neizgrađenog gradskog građevinskog zemljišta

Općinsko vijeće Ilidža na 16. redovnoj sjednici održanoj 21. juna 2018. u Multifunkcionalnoj sali donijelo je Odluku o načinu i uslovima prodaje neizgrađenog gradskog građevinskog zemljišta. Tom odlukom raspisuje se javni oglas za prodaju neizgrađenog građevinskog zemljišta u državnom vlasništvu putem javnog nadmetanja - licitacije, radi izgradnje poslovnog objekta u ulici Barska, (preko puta novoizgrađene zgrade i poslovnog objekta Sarajevo Waves), u skladu sa Regulacionim planom Otes, u površini od 1614 kvadratnih metara. Javni oglas za prodaju neizgrađenog

građevinskog zemljišta u državnom vlasništvu za izgradnju poslovnog objekta provest će se u skladu sa Pravilnikom u postupku javnog konkursa za raspolaganje nekretninama u vlasništvu Federacije Bosne i Hercegovine, kantona, općina i gradova.

Javni oglas objavit će se u "Oslobođenju", web sajtu općine i oglasnoj ploči Općine Ilidža i to najkasnije 15. dana prije dana određenog za licitaciju. Pravo učešća na oglas imaju domaća i strana fizička i pravna lica koja u skladu sa Zakonom mogu steći pravo vlasništva na teritoriji Federacije. Početna prodajna cijena za neizgrađeno građevinsko zemljište iznosi 200,00 KM po metru kvadratnom. Učesnik u javnom nadmetanju čija je ponuda prihvaćena kao najpovoljnija dužan je u roku od 15 dana od dana licitacije sa Općinom Ilidža zaključiti kupoprodajni ugovor i utvrđenu (kupovnu) cijenu za predmetno zemljište (uz umanjenje plaćene kaucije) uplatiti u roku od 15 dana od dana zaključenja ugovora o prodaji.


**REDOVNA SJEDNICA OPĆINSKOG VIJEĆA**

## Informacija o stanju komunalnih djelatnosti nad kojim inspekcijski nadzor vrši općinska komunalna inspekcija

Informacija o stanju komunalnih djelatnosti nad kojim inspekcijski nadzor vrši općinska komunalna inspekcija također je bila jedna od tačaka dnevnog reda. Informacija koju su vijećnici primili k znanju sadrži opis zakonskog uređenja djelatnosti nad kojim inspekcijski nadzor vrši Općinski komunalni inspektor, stanje u tim djelatnostima evidentirano kroz obavljanje inspekcijskog nadzora te prijedlog aktivnosti na unapređenju stanja. Inspekcijski nadzor općinskog komunalnog inspektora pretežno obuhvata preventivno djelovanje, ukazivanje na zakonito ponašanje, nalažanje sprovođenja mjera i podnošenje prekršanih prijava, u cilju blagovremenog otklanjanja nepravilnosti. Po svakoj prijavi obavlja se nadzor na terenu na licu mjesta, čini zapisnik o svim činjenicama i zapisnikom se stranke upozoravaju na sve nepravilnosti, na postojanje prekršaja i zapisnikom se naređuju mjere za otklanjanje nepravilnosti, pod prijetnjom podnošenja prekršajne prijave. Inspekcijski nadzor nad provođenjem ove Uredbe vrše nadležna kantonalna inspekcija, nadležna gradska inspekcija i nadležna općinska inspekcija. Inspekcijski nadzor obuhvata podnošenje prekršajnih prijava licima koja se ne pridržavaju odredbi ove Uredbe, za što su propisane novčane kazne od 200-700 KM za fizička lica i 2.000 i 6.000 KM, zavisno od prekršaja, za pravna lica. Zaključeno je da je potrebno sklopiti ugovor sa JP Ilidža o održavanju „nepokrivenih“ zelenih i rekreativnih površina, površina koje nisu obuhvaćene dosadašnjim programima, kao što su sporedne ulice, spomen obilježja, trotoare i sl. i površine koje niko ne čisti, planirati veća finansijska sredstva za izgradnju vodovodne i kanalizacione mreže, planirati izgradnju i regulisanje otpadnih atmosferskih voda, posebno uz saobraćajnice, u skladu sa zakonom i uspostaviti kontrolu nad upotrebom, uključivanje vlasnika ugostiteljskih i drugih objekata pri izradi planova uređenja javnih površina, radi informisanja i razmatranja njihovih ideja a sve u cilju zajedničkog djelovanja na unapređenju oblasti, te na zborovima građana u mjesnim zajednicama ukazivati građanima na značaj regulisanja otpadnih voda, kako fekalnih tako i atmosferskih, a sve u cilju poboljšanja stanja.

### Prijedlozi akata o regulisanju imovinsko-pravnih odnosa

Prijedlozi rješenja o regulisanju imovinsko-pravnih odnosa bila je tačka dnevnog reda 16. sjednice na kojoj je promjenjen prijedlog rješenja za Mirelu Smailović i Nafiju Dedić.

Vijeće je usvojilo prijedlog rješenja o rješavanju imovinsko-pravnih odnosa u svrhu legalizacije stambenog objekta po zahtjevu Jugo Nijaza, Hasković Ismete, Fako Mustafe, Fako Namire i Fako Vernese.



## Informacija o socijalnoj zaštiti na području općine Ilidža

Informacija o socijalnoj zaštiti na području općine Ilidža, položaju građana u stanju socijalne potrebe, te položaju djece i omladine s posebnim potrebama za dalju procedure našla se pred Općinskim vijećem 21. juna 2018. Analizirajući podatke, kako se navodi u materijalu, smatra se značajnim, da i pored velikog broja prava i izdvojenih budžetskih sredstva na godišnjem nivou, položaj korisnika socijalne zaštite na području općine Ilidža nije na zadovoljavajućem nivou, jer visina naknada koju ostvaruju nije dovoljna da zadovolji njihove potrebe, se samim tim ove naknade bitno ne utiču na poboljšanje socijalnog stanja u kojem se korisnici nalaze. Utvrđene visine naknada nisu se mijenjale od 2008. godine.

Odlukom Općinskog načelnika, a u skladu sa budžetom općine svake godine se odobravaju sredstva za isplatu jednokratnih novčanih pomoći u iznosima od 300 KM za teža tjelesna i mentalna oboljenja i 200 KM za lica sa umjerenim mentalnim retardacijama, zdravstvenim teškoćama (dijabetes, astma, bolesti srca, epilepsija i sl.). U evidencijama Službe za rad, socijalna pitanja, zdravstvo, izbjeglice i raseljena lica nalazi 98 osoba sa težim mentalnim i tjelesnim oštećenjima, a kao i 194 lica sa umjerenim tjelesnim oštećenjima. Vijećnici su informisani i o provođenju Zakona o pravima branilaca i članova njihovih porodica i Zakona o posebnim pravima dobitnika ratnih priznanja i odlikovanja i članova njihovih porodica.



## Općina Ilidža donirala sredstva za klavir Muzičkoj školi Ilidža

Osnovna muzička škola na Ilidži dobit će koncertni klavir. Općina Ilidža za tu namjenu obezbijedila je 80.000 KM iz svog budžeta. Tim povodom načelnik Općine Ilidža prof. dr. Senaid Memić i direktorica JU Osnovna muzička škola Dijana Preljević potpisali su 14. juna 2018. godine u sali Općine Ilidža Sporazum za nabavku koncertnog klavira za koncertnu salu u JU Osnovna muzička škola Ilidža.

“Ovo je trenutak o kome su učenici i uposlenici JU Osnovna muzička škola Ilidža dugo sanjali i maštali. Zahvaljujući načelniku Općine Ilidža prof. dr. Senaidu Memiću i velikoj podršci koju puža obrazovanju, danas smo potpisali ovaj sporazum. Naša škola je prva muzička škola za koju je u bivšoj Jugoslaviji namjenski napravljen objekat za muzičko obrazovanje i ima koncertnu dvoranu sa 237 sjedećih mjesta. Sa ovim klavirom ćemo biti u mogućnosti da realizujemo mnoge muzičke radionice, festivale i takmičenja”, rekla je Dijana Preljević, direktorica JU Osnovna muzička škola.

“Zadovoljstvo vaših učenika naša je obaveza i radost ujedno. Nadamo se da će klavir služiti učenicima, a i da će mnogi posjetioci koji budu dolazili u vašu školu uživati uz njegove zvuke”, izjavio je Memić.

## Uručeno 58 ugovora

Načelnik Općine Ilidža Senaid Memić 20. juna 2018. godine uručio je ugovore za (su)finansiranje projekata iz oblasti sporta, kulture i obrazovanja iz budžeta Općine za 2018. godinu.

Na osnovu definisanih kriterija za dodjelu sredstava iz budžeta na javni poziv mogla su aplicirati udruženja, klubovi i sportska društva registrovana u BiH, sa sjedištem na području općine Ilidža ili na području druge općine, pod uslovom da se projekat realizuje u interesu građana općine Ilidža i u potpunosti na području općine Ilidža.

Na raspisani javni poziv prijavilo se 98 aplikantata sa 125 projektnih prijedloga. Na prijedlog Komisije za odabir projekata koja je izvršila ocjenu projekata općinski načelnik je donio odluku o (su)finansiranju 58 projekata za koje iz budžeta Općine Ilidža izdvojeno 90.000 KM.

Odobrena su sredstva za 15 projekata iz oblasti sporta u iznosu od 20.000 KM, kulture 30.000 KM za 18 projekata i 30.000 KM za 25 projekata iz obrazovanja.

Načelnik Memić je čestitao aplikantima, te istakao nadu da će se projekti realizovati u interesu građana.

## Načelnik Memić nagradio 190 učenika

Učenike osnovnih škola sa područja općine Ilidža, koji su osvojili jednu od nagrada na kantonalnom, federalnom, državnom i međunarodnom takmičenju osnovnih škola za 2017/2018. godinu 19. juna 2018. godine primio je načelnik Općine Ilidža prof. dr. Senaid Memić. Za 190 učenika pripremljene su novčane nagrade.

„Vi ste naš ponos, naši najbolji sugrađani, Vi ste najbolji u svojim oblastima, i uvijek gdje god išli recite da ste sa Ilidže i ne zaboravite da ste vi naši ambasadori. Imate i obavezu da svoju općinu nastavite i dalje da promovirate i učinite je još boljom. Budite saradnici sa nama i znanjem i uspjesima gradimo Ilidžu” rekao je načelnik Općine Ilidža prof. dr. Senaid Memić.

Harun Alibegović učenik Osme osnovne škole “Amer Čenanović” u takmičenju iz matematike na kantonalnom nivou bio je treći.

“Velika mi je čast što sam svoju općinu predstavljao i postigao ovaj rezultat. Moglo je i bolje. Hvala na nagradi koju nam je načelnik dao, jer Općina ne samo da je prepoznala naš talenat, već nas stalno i nagrađuje” dodao je Harun Alibegović.





## Osigurano trajno stambeno rješenje za 18 povratničkih porodica



Osamnaest (18) porodica izbjeglih i raseljenih lica dobilo je ključeve stanova u novoizgrađenoj zgradi u Općini Ilidža, u okviru Regionalnog stambenog programa u Bosni i Hercegovini. Dodjelom ključeva i svečanim presijecanjem vrpce, 18 korisničkih porodica zvanično useljeva u novoizgrađenu stambenu zgradu u lici Suvada Đulimana broj 40 i 42. Vrpču su presijekli ministrica za ljudska prava i izbjeglice BiH Semiha Borovac, federalni ministar za izbjegla i raseljena lica Edin Ramić, načelnik Općine Ilidža prof. Senaid Memić. Prilikom odabira korisnika Općina Ilidža je postupila u skladu sa Pravilnikom o kriterijima i postupku odabira korisnika, dodjeli, načinu i korištenju stambenih jedinica u višestambenim zgradama u okviru Regionalnog stambenog programa o dodjeli stanova socijalno raseljenim licima. Ceremonija uručjenja ključeva upriličena je 14. juna 2018. ispred novoizgrađene zgrade na Ilidži. Stanove su dobili: Golo Sabiha, Lekić Ramajana, Čavrk Hava, Hukara Mirveta, Halilović Munevera, Žiga Dževad, Salčin Elvira, Polimac Hatidža, Stupar Mirsada, Lošić Adnan, Bičo Dženita, Mehmedika Sead, Ališehović Ševala, Hadžiahmetović Anes, Čubro Sinan, Karamujić Kenajid, Šabanović Hatidža i Mehić Alema. Potprojektom BiH3 vrijednosti oko 34 miliona KM planirana je izgradnja 24 zgrade sa 512 stanova namijenjenih za smještaj interno raseljenih porodica i porodica izbjeglih iz Hrvatske u Bosnu i Hercegovinu. Potprojektom BiH3 vrijednosti oko 34 miliona KM planirana je izgradnja 24 zgrade sa 512 stanova namijenjenih za smještaj interno raseljenih porodica i porodica izbjeglih iz Hrvatske u Bosnu i Hercegovinu. Pored Općine Ilidža, već su izgrađene zgrade u Bosanskom Petrovcu (20 stanova), Pale-Pračići (6 stanova), Foči FBiH (9 stanova) i Tuzli (34 stana), a grade se u Goražđu (20 stanova), Jajcu (7 stanova), Olovu (16 stanova), Zenici (62 stana), Prijedoru (82 stana),

Banja Luci (48 stanova), Bijeljini i Derventi (po 30 stanova), Gradišci (32 stana), Bileći i Brodu (po 15 stanova), Vlasenici (20 stanova), Foči (12 stanova) te u Brčko Distriktu BiH 2 zgrade sa 16 stanova. Vrijednost Regionalnog stambenog programa je oko 1,2 milijarde KM, od čega se više od 200 miliona odnosi na projekte u BiH. Sve to bilo bi neizvodivo bez podrške međunarodne zajednice, prije svih, Evropske unije, kao najvećeg donatora sa učešćem od oko 450 miliona KM te Sjedinjenih Američkih Država, Italije, Njemačke, Norveške, Švicarske, Danske, Turske i drugih zemalja donatora i podrške UNHCR-a, OSCE-a i Razvojne banke Vijeća Evrope. Bosna i Hercegovina je za Vodeću instituciju Državnog projekta stambenog zbrinjavanja imenovala Ministarstvo za ljudska prava i izbjeglice BiH, a implementaciju potprojekata povjerila je Federalnom ministarstvu raseljenih osoba i izbjeglica, Ministarstvu za izbjeglice i raseljena lica Republike Srpske, te Odjelu za izbjeglice, raseljene osobe i stambena pitanja Vlade Brčko Distrikta BiH.





## Za asfaltiranje 12 ulica izdvojeno 569.695.13 KM

**N**a području općine Ilidža u toku je rekonstrukcija 12 ulica. Za te namjene Općina je izdvojila 569.695.13 KM.

U toku je rekonstrukcija platoa Trg oteškog bataljona, površine 2103 kvadratnih metara.

Investitor je Općina Ilidža, a iz budžeta je izdvojeno 76.280,62 KM. Izvođač radova je firma Braća Mujić d.o.o. U toku je i rekonstrukcija ulice. Bistrički put, dužine 600, a širine tri metra. Radovi su povjereni firmi Braća Mujić d.o.o., a finansira ih Općina Ilidža, u vrijednosti 127.592,00 KM. Radnici firme Braća Mujić d.o.o. izvode radove asfaltiranja u ulici Gliše Jankovića. Radi se asfalt u dužini 290 metara i širini pet metara. Investitor je Općina Ilidža u iznosu 100.367,00 KM. Stanovnici ulice Butmirski vrtovi dobili su novi asfalt u dužini 475 i širini tri metra. Investitor radova je Općina Ilidža. Izvođač radova bila je firma Braća Mujić d.o.o, a vrijednost radova je 52.985,00 KM.

Općina Ilidža je finansirala asfaltiranje ulica u omjeru 70 posto, a građani 30 posto, osam ulica.

Završeno je asfaltiranje ulica Vrela, Zeleni ariš do broja 54, Šamin gaj 6A-6B, Bistrički put do broja 18, Zenik 142-200, Hipodrom 189-183 i Zenički potok (spoj ulice Zenik do mosta).



Asfaltirana je ulica Vrela od br. 1 u dužini 633, a širine tri metra. Izvođač radova bili su konzorcij firmi OXA d.o.o i Demus d.o.o. Vrijednost radova je 63.459,00 KM.

Okončani su radovi i u ulici Zeleni ariš do br. 54, u dužini 455, širini tri i po metra.

Izvođači radova su konzorcij firmi OXA d.o.o i Demus d.o.o, a vrijednost radova je 50.832,00 KM. Asfaltirana je i ulica Šamin gaj 6A-6B, u dužini 80 a širini tri metra.

Izvođač radova konzorcij firmi OXA d.o.o i Demus d.o.o., a vrijednost radova 7.227,69 KM.

Asfaltirana je i ulica Bistrički put do br. 18 u dužini 305 i širini tri i po metra.

Radovi su povjereni konzorcij firmi OXA d.o.o i Demus d.o.o. u vrijednosti 31.337,82 KM.

Završeno je i asfaltiranje ulice Zenik 142-200 u dužini 104 i širini tri metra.

Izvođač radova konzorcij firmi OXA d.o.o i Demus d.o.o., a vrijednost radova 10.124,00 KM.



Novi asfalt je i u ulici Hipodrom 179-183 dužine 45, širine četiri metra.

Izvođač radova konzorcij firmi OXA d.o.o i Demus d.o.o. Vrijednost radova 6.211,00 KM.

Završeno je i asfaltiranje ulice Zenički potok (spoj ulice Zenik do mosta) dužine 204, i

širine dva i po metra. Izvođač radova konzorcij firmi OXA d.o.o i Demus d.o.o.

Vrijednost radova je 15.899,00 KM. U toku je asfaltiranje ulice Vidovci dužine 295, širine tri metra. Izvođač radova konzorcij firmi OXA d.o.o i Demus d.o.o.

Vrijednost radova 27.377,00 KM.

### Drvored na Stupu

**N**ovi drvored od 21. juna raste u našoj općini i to u naselju Stup u zelenom pojasu uz saobraćajnicu 12 transverzale.

Radnici KJKP Rad zasadili su 31 novo stablo bjelogorice, a nabavku i sadnju je finansirala Općina Ilidža.

Završetkom sadnje novih stabala zvanično su i završeni rekonstrukcija i hortikulturno uređenje prostora uz saobraćajnicu, a nove mlade sadnice od sada se rasti i ukrašavati ovaj dio Ilidže.





## Javna rasprava o Nacrtu Urbanističkog projekta „Spomenički kompleks Tunel D-B“



Javna rasprava vezana za Nacrt Urbanističkog projekta „Spomenički kompleks Tunel D-B“ održana je 25. juna u Multifunkcionalnoj sali Općine Ilidža. Predstavnici Zavoda za planiranje razvoja Kantona Sarajevo su predstavili ponuđena rješenja građanima i zainteresiranim subjektima te dali mogućnost da iznesu svoje prijedloge i mišljenja.



Javnoj raspravi prisustvovali su i predstavnici Zavoda za zaštitu kulturno-historijskog i prirodnog naslijeđa Kantona Sarajevo, Međunarodnog aerodroma, Zavoda za planiranje, Općine i građani.

Svi zainteresirani subjekti do 10. jula 2018. mogu u pisanoj formi dostaviti svoje prijedloge, mišljenja i sugestije na protokol Općine Ilidža.

### Pripreme za Festival narodne muzike „Ilidža 2018“

U Općini Ilidža 21. juna 2018. održan je sastanak Organizacionog odbora za održavanje Festivala narodne muzike „Ilidža 2018“ na kojem se razgovaralo o detaljima organizacije ovog muzičkog događaja.

I ove godine Općina Ilidža, kao tradicionalni organizator i nosilac većine obaveza organizacije dosadašnjih ilidžanskih festivala, pripremu, organizaciju i realizaciju kulturno-muzičke manifestacije Festival „Ilidža 2018“ povjerila je opet Hayat TV-u. Na konkurs za prijavu autorskih djela prijavili su se autori 51 pjesme, a takmičiti će se njih 17.

Pri samom izboru kompozicija žiri je posebnu pažnju usmjerio na očuvanje muzičkog oblika pjesme BiH. Festival počinje 18. jula u 20 sati na Ljetnoj pozornici Ilidža.



### Donirano šest računara školi u Glavatičevu

Javnoj ustanovi OŠ „Glavatičevo“ Općina Konjic, Općina Ilidža donirala je šest računara sa monitorima i pratećom opremom. Vrijednost donacije je 10.063. KM.

Naime, pred sam kraj školske godine ova javna ustanova dobila je značajnu donaciju, koja će korisno poslužiti u novoj školskoj godini.

Računari će poslužiti za nastavu informatike, tako da su i nastavnici i učenici na velikom dobitku.





## Upriličen prijem za 40 šehidskih porodica

Povodom Ramazanskog Bajrama i Dana šehida u Općini Ilidža 16. juna 2018. upriličen je tradicionalni prijem za 40 porodica šehida, čiji su članovi poginuli kao pripadnici Armije Republike Bosne i Hercegovine. Porodice je primio načelnik Općine Ilidža prof. dr. Senaid Memić.

“Želim da na ovaj način simbolično skrenemo pažnju na vašu populaciju. Duboko poštujem porodice šehida i poginulih boraca i poštujem sve one koji su branili državu BiH, a to što smo mi danas ovdje, je zasluga onih koji su dali život za odbranu ove države. Ne mislim da išta vašu bol može ublažiti, ali bar da vam kažem da oni nikad neće biti zaboravljeni i njihove zasluge”, rekao je između ostalog Memić, te istakao da je ovo prilika da se sretnu, porazgovaraju o problemima i načinu kako da ih riješe.

Porodicama su uručene hedije u iznosu po 100 KM. Prijemu je također prisustvovao i predsjednik Organizacije porodica šehida i poginulih boraca Općine Ilidža Almin Škrijelj.

## Svečana akademija Podružnice 10

U Domu kulture Butmir 13. juna 2018. godine održana je svečana akademija, povodom godišnjice Podružnice 10 Četvrtog motorizovanog bataljona, Četvrte viteške motorizovane brigade.

Zahvalnice su dobili veterani: Rahman Tajić, Alija Hasković, Šuhreta Destanović, Saudin Mirvić, Mehmed Mujanović, Halil Maslo, Azem Tahirović, Salko Pašalić, Mujo Pačariz i Zeno Podbičanin. Nagrađeni su i najbolji šahisti i to treće mjesto Fadil Hadžić, drugo Džeko Škrijelj i prvo Mujo Bojadžija. Za najbolje literarne radove nagrade su osvojili učenici Ena Muhović iz Osme osnovne škole “Amer Čenanović”, treće mjesto, Mersiha Bijelojna, iz Pete, drugo mjesto i prvo Adna Rebronja također iz Pete osnovne škole.

Iz streljaštva u kategoriji djevojčica najbolje su bile Lamija Prljača, koja je bila treće mjesto, drugo Džejna Medinić i prvo Adna Isanović, a u kategoriji dječaka treće mjesto Ishak Gadžo, drugo Faris Bilalović i prvo mjesto Kerim Šehović. U odbojkaškom turniru učestvovali su učenici Osme osnovne škole “Amer Čenanović”, a najbolji su bili učenici VI-1, VIII-2 I VIII-1 odjeljenja ove škole.

## Memorijalno-historijski susret „Akcija-pokušaj deblokade Rakovice”

U organizaciji Općine Ilidža i Udruženja boraca „Veterani rata 1992-1995 Rakovica“ 6. juna 2018. godine održan je Memorijalno-historijski susret „Akcija-pokušaj deblokade Rakovice“ i Dan mjesne zajednice Rakovica. Brojne delegacije položile su cvijeće na spomen-obilježje, proučili Fatihu i odali počast poginulim borcima Rakovice. U prisustvu boraca, građana, učenika, predstavnika Općine i boračkih udruženja, na skupu su evocirane uspomene na 6. juni 1992. godine kada su borci sa ovih prostora pokušali osloboditi Rakovicu. U okviru obilježavanja ovog značajnog datuma porodicama šehida podijeljeni su ramazanski paketi. Prigodan kulturno-umjetnički program pripremili su učenici Devete osnovne škole.



## Implementacija adresnog registra

U prostorijama Općine Ilidža 21. juna 2018. godine održan je sastanak sekretara mjesnih zajednica sa područja općine. Na sastanku je predstavljen projekat implementacije adresnog registra na području ove općine. Cilj i namjera Općine Ilidža je unaprijeđenje općinskih usluga, njihova modernizacija i poboljšanje, te je ovo je samo jedan element na tom putu koji će omogućiti precizno, daleko bolje planiranje i evidenciju.

Po uspostavi adresnog registra bit će uspostavljena elektronska baza podataka sa svim potrebnim informacijama, a pristup adresnom registru će biti besplatan za sve građane.

Sekretari mjesnih zajednica će u periodu od 22. juna do 21. oktobra 2018. godine, utvrđivati postojeće stanje na terenu, provjeriti tačnost numerisanih brojeva na objektima, ustanoviti broj objekata sa neoznačenim brojevima i izvršit će se kvalitetna analiza koja će za cilj imati da u narednom periodu svaki objekat ima kućni broj. Pristup adresnom registru će biti besplatan za sve građane.







# Uspješno organizovan Festival sporta u Hrasnici



**P**rvi Festival sporta Hrasnica 2018, koji je trajao tri dana, 24. juna je uspješno okončan. Sportska manifestacija u potpunosti je opravdala očekivanja organizatora, iako su nevolje i jaka kiša poremetili malo plan i program. Posthumno plakete su dodijeljene Sabitu Hadžiću (košarka) i Sakibu Ibrahimoviću (fudbal), plaketa za doprinos razvoju boksa dodijeljena je Almedinu Fetahoviću, selektoru bokserske reprezentacije Bosne i Hercegovine, koji je uprkos činjenici da se spreman za put na Mediteranske igre na kojima je 1993. godine osvojio prvu medalju za našu zemlju našao vremena da se pojavi u Hrasnici.

Plakete su još dobili Hamdija Kekić, Adnan Muzur, Haris Zolota (odbojka), Sead Balić, Alija Tutun, Suad Muzur (košarka), Mujo Tutun, Almir Memić (fudbal), Bilal Šuman, Ibrahim Hošić, Fuad Lokvančić (rukomet), Esad Delić

## Muzički kutak na Ilidži

**U** Multimedijalnoj sali 7. juna 2018. godine održan je koncert za djecu u organizaciji Sarajevske filharmonije. Izvedbom Koncerta za djecu, pod nazivom Muzički kutak obradovani su školari sa područja ove općine. Uz maestru Samru Gulamović kroz čudesni svijet klasične muzike djecu je vodio Mario Drmać.



(sjedeća odbojka), Mufid Drakovac (karate) i Aziz Turudija (mali fudbal). Plaketa je završila i u rukama Amira Nezirevića, koji je svih proteklih godina bio medicinska podrška brojnim sportistima s Ilidže, a dobitnik identičnog priznanja je i doktor Midhat Mujić, predsjednik Saveza dijabetoloških udruženja u BiH.

Zahvalnice za svesrdnu pomoć u organizaciji turnira dobili su Saljo Mrkulić, Džana Šaćić, Fuad Husić, Enes Bešović, Fikret Prevljak i načelnik Općine Ilidža prof.dr. Senaid Memić.

U kategoriji dječaka rođenih 2008. godine prvo mjesto pripalo je ekipi Radnika iz Hadžića, drugo Bosna Union, dok je treće mjesto pripalo sastavu FK Mladost iz Otesa. Trećeplasirani tim ponio je i nagradu za fair-play. Za najboljeg igrača proglašen je Adin Tulić (FK Radnik Hadžići), dok je najbolji golman Benjamin Adžem (Bosna Union).

U konkurenciji dječaka rođenih 2007. godine najbolji je Željezničar. Drugo mjesto je pripalo ŠF Tango, dok je ŠF Academica završila na trećem mjestu. Arnel Ciljević (FK Željezničar) dobio je nagradu za najboljeg igrača, dok je za najboljeg čuvara mreže proglašen Dejan Trapara (ŠF Tango).

Odbojkašice Ilidže slavile su na odbojkaškom dijelu turnira ispred Igmana, dok je na rukometnom turniru najbolja bila ekipa RK Briješće.

Više od 2.000 gledalaca pratilo je manifestaciju, a mogli su vidjeti i prezentacije karate, zumba, uživati u revijalnim utakmicama fudbala i košarke, ali i pratiti atletske utrke.





## Fadil Fandžo Hadžović izdaje šestu knjigu

Zapitamo li se ponekad ko živi blizu nas. Koje duše dišu i šta sanjaju, misle, brinu i šta ih čini sretnim. U današnjem brzom načinu života postoje ljudi koji pisanjem žele da ispolje svoje misli i da ukažu na pojave koje su oko nas. Takav je naš komšija Fadil Fandžo Hadžović. Izdao je pet knjiga, a inspiracija mu je ljubav i domovina.

“Oduvijek sam želio da pišem, a svaki umjetnik ponekad sumnja u sebi i ima trenutaka kada želi da odustane. Kada pišem ja razvijam ideju za neku priču, stvaram likove, polako sagledavam kako će knjiga izgledati i onda počinjem da pišem. Od djetinjstva pišem i pisat ću do smrti. Prvu knjigu napisao sam 1984. godine i to knjigu poezije, a uskoro završavam i novu koja će ugledati svjetlo dana ovih dana” kazao je Fadil Fandžo Hadžović.

Fadil Fandžo skromni čovjek reče da prodaje knjige putem FB i uličnih prodavača i da slabo ide, ali to ga neće omesti da svoju dušu otvori i piše i ko zna kad i gdje će njegove poruke doprijeti.



## Nagrađeni najuspješniji učenici Osnovne muzičke škole

Učast najuspješnijim učenicima i nastavnicima Javne ustanove Osnovna muzička škola Ilidža 20. juna 2018. godine u prepunoj koncertnoj dvorani škole održan je svečani završni koncert na kojem su dodijeljene diplome i nagrade učenicima koji su postigli odlične rezultate na federalnim, državnim i internacionalnim takmičenjima.

Učenici ove škole su na takmičenjima osvojili 22 prve nagrade, 17 drugih i devet trećih nagrada. Titulu najuspješnijeg učenika u 2017/2018. godini, disciplina solo klavir dobila je učenica Ilhana Rahić, a najuspješniji učenici u kamernom miziciranju disciplina klavir četveroručno dobile su Ajla Hrbinić i Ida Kahrmanović.

Ovom prilikom uručeno im je priznanje škole. Titulu najuspješnijeg nastavnika u 2017/2018. godini dobili su prof. Larisa Begić i Amsal Ganović, te im je ovom prilikom direktorica škole Dijana Preljević uručila i priznanje škole. Koncertu je prisustvovao načelnik Općine Ilidža prof. dr. Senaid Memić sa saradnicima.



## Promocija zbirke poezije autora Mirnesa Omerovića

U prepunoj sali Multimedijalnog centra Općine Ilidža 19. juna 2018. godine, održana je promocija zbirke poezije “Zemlja bosanska” autora Mirnesa Omerovića, učenika osmog razreda Desete osnovne škole Ilidža, a u izdanju Udruženja lektora i komunikologa u BiH. Promociju je organizirao Dječiji klub Udruženja lektora i komunikologa u BiH u saradnji sa Desetom osnovnom školom, čiji su učenici pjesmama, recitalima i performansima uveličali ovaj događaj. Pored autora, o knjizi su govorile Nermina Alihodžić Usejnovski, urednica i Aiša Sadiković, recenzentica. Promotori su istakli pjesnikov neobičan talenat nizanja slobodnih stihova, ali i ozbiljnost teme, kakva je domoljublje. Pjesnik se u svom govoru posebno osvrnuo na domoljublje kao glavnu inspiraciju i poslao poruku mladima “da treba ostati, a ne ostaviti, jer domovina je jedna, nju voliš i bol zbog nje podnosiš”.

Pored promotora, skupu su se obratili i Refik Dacić, direktor Desete osnovne škole koji se osvrnuo na podršku koju škola pruža svim talentovanim učenicima u svim oblastima, te Resul Alić koji je govorio o smislu života o čemu govore i neke pjesme u zbirci. Iskreno se nadamo da će Mirnes nastaviti pisati poeziju i doprinostiti našem književnom bogatstvu.



## Mali košarkaši dostojno predstavili Ilidžu

**N**aši mali košarkaši i košarkašice KK Ilidža 23. juna 2018, zajedno sa svojim vršnjacima iz cijelog svijeta, odigrali su završne utakmice na 26. međunarodnom turniru u Materi. Nakon utakmica, uslijedila je dodjela pehara i medalja za učesnike turnira.

“Ovo je bilo jedno prekrasno iskustvo za „zvijezde“, koje će sigurni smo pamtiti, cijeli život. Sigurni smo da smo na najbolji mogući način, predstavili BiH, Sarajevo, Ilidžu i naš KK Ilidža” rekao nam je Admir Sakoč, direktor KK Ilidža.

## Male stvari čine mnogo

**C**entar za slušnu i govornu rehabilitaciju Sarajevo dodijelio je načelniku Općine Ilidža prof. dr. Senaidu Memiću zahvalnicu za njegov senzibilitet za finansijsku pomoć u realizaciji Škole prirode korisnika ovog centra. Škola prirode održana je u junu u Ajdinovićima.



## Bajramski turnir u šahu

**U**organizaciji Šahovskog kluba “Igman” 17. juna na Ilidži održan je Bajramski turnir u šahu, na kojem je učestvovalo 12 igrača sa područja općine Ilidža. Prvo mjesto je osvojio Eldin Bučan, drugi Nedžad Dedović, a treći Vehbija Gojak. Za prva tri mjesta podijeljene su prigodne nagrade.





## Šesti po redu međunarodni memorijalni fudbalski turnir “Josip Katalinski Škija”

Šesti po redu međunarodni memorijalni fudbalski turnir “Josip Katalinski Škija” održan je 8., 9. i 10. juna u Sarajevu. Memorijalni turnir igrao se u znak sjećanja na Josipa Katalinskog, nekadašnjeg sjajnog fudbalera sarajevskog Željezničara i francuske Nice, te reprezentativca bivše SFR Jugoslavije.

Učestvovalo je 1.000 dječaka, 72 selekcije iz 40 ekipa i iz Srbije, Crne Gore, Slovenije i BiH.

